

摘藻堂四庫全書薈要

集部

欽定四庫全書薈要卷一萬九千十六

集部

御定佩文齋詠物詩選卷三百九十四

薜蘿類

五言古

詠女蘿

齊

王融

羃歷女蘿艸蔓衍旁松枝含煙黃且綠因風卷復垂

賦松上輕蘿

陳

劉刪

葉繞千年蓋條依百尺枝屬與松風動時將薜影垂學

帶非難結為衣或易披山阿若近遠獨有楚人知

剡原九曲

明高啟

山折水暫旋山開水仍往東陂匯初成秋色瀾然廣碧
蘿花茸茸月映石壁上何時試沿洄一理煙中舫

五言絕句

石宮

唐元結

石宮夏水寒寒水宜高林遠風吹蘿蔓野客熙清陰

石門塢

宋朱子

朝開雲氣擁暮掩薜蘿深自笑晨門者那知孔氏心

煙蘿境

元虞集

玉女乘煙霧松間采薜蘿飛行了無迹明月送空歌

富林春曉

明陸德蘊

旭日始啟旦鳥聲出煙蘿艸堂檢春事花落風檐多

七言絕句

慈湖磯

元貢奎

碧蘿交蔓絡崖陰潭底潛蛟萬仞深今古江流推不去

濕雲長護最高岑

御定佩文齋詠物詩選卷三百九十四

欽定四庫全書薈要卷一萬九千十七

集部

御定佩文齋詠物詩選卷三百九十五

菰蒲類

五言古

拔蒲

晉樂府

青蒲銜紫茸長葉復從風與君同舟去拔蒲五湖中

其二

朝發桂蘭渚晝息桑榆下與君同拔蒲竟日不成把

詠蒲

齊謝朓

離離水上蒲結水散為珠間厠秋菡萏出入春鳬雛初
萌寔雕俎暮蕊雜椒塗所悲塘上曲遂鑠黃金軀

蒲生行

謝朓

蒲生廣湖邊託身洪波側春露惠我澤秋霜縈我色根
葉從風浪常恐不永植攝生各有命豈云智與力安得
遊雲上與爾同羽翼

賦得蒲生我池中

梁元帝

池中種蒲葉葉影陰池濱未好中宮薦行堪隱士輪為
書聊可截匹柳復宜春瑞葉生符苑鏤碧獻周人

詠菰

梁沈約

結根布洲渚垂葉滿皋澤匹彼露葵羹可以留上客

魯東門觀刈蒲

唐李白

魯國寒事早初霜刈渚蒲揮鎌若轉月拂水生連珠此
草最可珍何必貴龍鬚織作玉床席欣承清夜娛羅衣
能再拂不畏素塵蕪

青青水中蒲

唐韓愈

青青水中蒲，下有一雙魚。君今上隴去，我在與誰居。

其二

青青水中蒲，長在水中居。寄語浮萍艸，相識我不如。

其三

青青水中蒲，葉短不出水。婦人不下堂，行子在萬里。

蒲

明薛蕙

昔聞詠塘上，今見翫池中。紫茸含細蕊，綠帶舞輕叢。蜻

鈴高下逐翡翠往來通徘徊桂蘭渚竟日與君同

長短句

拔蒲歌

唐張祜

拔蒲來領郎鏡湖邊郎心在何處莫趁新蓮去拔得無
心蒲問郎看好無

七言律

蒲

唐徐寅

濯秀盤根在碧流紫茵含露向晴抽編為細履隨君步

織作輕帆送客愁
疎葉稍為投餌釣
密叢還礙採蓮舟
鴛鴦鸕鶿多情甚
日日雙雙遶榜游

蒲劍

明朱之蕃

萍化芹香水國春
蒲抽鋌鏑劍光新
不資淬礪能全德
常合雌雄若有神
浴鴛忘情時振羽
潛蛟懼截欲存身
江干森立非無意
待剖雙魚慰遠人

五言絕句

白石灘

唐王維

清淺白石灘綠蒲向堪把家住水東西浣紗明月下

北垞

唐
裴迪

南山北垞下結宇臨陂湖每欲採樵去扁舟出菰蒲

七言絕句

夔州歌

唐
杜甫

瀼東瀼西一萬家江北江南春冬花背飛鶴子遺瑱藍
相趁鳬雛入蔣芽

種蒲

唐
陸龜蒙

杜若谿邊手自移，旋抽煙劍碧參差。
何時織得孤帆去，懸向秋風訪所思。

送慈師北遊

宋林逋

鬱鬱蒲葦染水田，渡淮閒寄賣人船。
知師一枕清秋夢，多為林間放鶴天。

秋日

宋秦觀

霜落邗溝積水清，寒星無數傍船明。
菰蒲深處疑無地，忽有人家笑語聲。

江邨晚眺

宋戴復古

數點歸鴉過別邨，隔灘漁笛遠相聞。
菰蒲斷岸潮痕濕，日落空江生白雲。

江浦夜泊

元薩都拉

千里長江浦月明，星河半入石頭城。
棹歌未斷西風起，兩岸菰蒲雜雨聲。

御定佩文齋詠物詩選卷三百九十五

欽定四庫全書薈要卷一萬九千十八集部

御定佩文齋詠物詩選卷三百九十六

草類 附莎 蕪 蓬 茅 著 蕓 鳧葵 瓦松

五言古

細草

梁元帝

依堦疑綠蘚傍渚若青苔漫生雖欲遍人跡會應開

樹中草

梁蕭子顯

幸有青袍色聊因翠幄凋雖間珊瑚蒂非是合歡條

詠青草

陳劉刪

雨淋三春葉風傳十步香映袍憐色重臨書喜帶長

庭草

唐曹鄴

庭草根自淺造化無遺功低回一寸心不敢怨春風

長短句

江草歌送盧判官

唐皇甫冉

江皋兮春早江上兮芳草雜蘼蕪兮杜蘅作叢秀兮復
羅生被遙隰兮經長衍雨中深兮煙中淺目渺渺兮

增愁步遲遲兮堪寥漙之浦兮湘之濱思夫君兮送美人
吳洲曲兮楚鄉路遠孤城兮依獨戍新月能分裛露時
夕陽照見連天處問君行邁將何之淹泊汭風日遲
處處汀洲有芳草王孫詎肯念歸期

春艸謠

唐顧况

春草不解行隨人上東城正月二月色綿綿千里萬里
傷人情

五言律

庭草

唐杜甫

楚草經寒碧庭春入眼濃舊低收葉舉新掩捲牙重步
履宜輕過開筵得屢供看花隨節序不敢強為容

賦得古原草送別

唐白居易

離離原上艸一歲一枯榮野火燒不盡春風吹又生遠
芳侵古道晴翠接荒城又送王孫去萋萋滿別情

路傍草

唐于鄴

春至始青青香車碾已平不知山下處來遠路傍生每

歲有人在何時無馬行應隨塵與土吹滿洛陽城

池塘生春草

唐
陳陶

謝公遺詠處池水夾通津古往人何在年來草自春色
宜波際綠香異雨中新今日青青意空嗟行路人

芳草

唐
李中

二月正綿綿離情被爾牽四郊初過雨萬里正鋪煙春
戀殘花惹留連醉客眠飄香是杜若最憶楚江邊

賦得江邊草

李中

岸春芳草合幾處思纏綿向暮江離雨初晴杜若煙靜
宜幽鶯立遠稱碧波連送別王孫處萋萋南浦邊

春草

明
陳德懿

無人種春草隨意發芳叢綠遍郊原外青回遠近中
羣煙粘落絮和雨襯殘紅不解王孫去淒淒對晚風

五言排律

賦得御園芳草

唐
陸贄

陰陰御園裏瑤艸日光長
霍靡含煙霧依稀帶夕陽
雨

餘萋更密風暖蕙初香擁妓緣馳道乘輿入建章濕煙
搖不散細影亂無行恒恐韶光晚何人辨早芳

賦得龍池春草

唐
陳 詡

青春光鳳苑細草遍龍池曲渚交蘋葉廻塘惹柳枝因
風初冉冉覆岸欲離離色帶金堤靜陰連玉樹移日光
浮蘼靡波影動參差豈比生幽遠芳馨衆不知

賦得龍池春草

唐
宋 迪

鳳闕韶光遍龍池草色勻煙波全讓綠堤柳不爭新翻

葉迎紅日飄香借白蘋幽姿偏占暮芳意欲留春已勝
生金埒長思藉玉輪翠華如見幸正好及茲辰

龍池春草

唐李洞

龍池清禁裏芳草傍池春旋長方遮岸全生不染塵和
風輕動色湛露靜流津淺得承天步深疑遶御輪魚尋
倒影沒花帶濕光新肯學長河畔綿綿思遠人

春草碧色

唐王叡

習習東風扇萋萋草色新淺深千里碧高下一時春嫩

葉舒煙際微香動水濱金塘明夕照輦路惹芳塵造化
功何廣陽和力自均今當發生日滙懇祝良辰

春草凝露

唐
張友正

蒼蒼芳草色含露對青春已賴陽和長仍慚潤澤頻日
臨猶未滴風度欲成津蕙葉垂偏重蘭叢洗轉新將行
愁裏徑欲採畏濡身獨愛池塘畔清華襲遠人

賦得生芻一束

唐
于結

比玉人應重為芻物自輕向風傾弱葉裛露示纖蒸

練宜春景芊綿對雨情每慚蘋藻用多謝
荳蘭榮孺子才雖遠公孫策未行諮詢如
不棄終冀及微生

賦得生芻一束

唐鄭孺華

孫弘期射策長倩贈生芻至潔心將比忘
憂道不孤芝蘭方入室蕭艾莫同途馥馥
香猶在青青色更殊芳寧九春歇薰豈十
年無葑菲如堪采山苗自可逾

禮闈試階前春草生

唐闕名

河畔雖同色南宮淑景先微開曳履處常
對講經前得

地風塵隔依林雨露偏已逢霜候改初寄日華妍影與
叢蘭雜榮將衆卉連哲人如不雉生意在芳年

七言律

芳草

唐羅鄴

廢苑牆南殘雨中似袍顏色正蒙茸微香暗惹遊人步
遠綠纔分鬪雉蹤三楚渡頭長恨見五侯門外却難逢
年年縱有春風便馬跡車輪一萬重

詠草

宋程子

漸覺東華意思與陳根初動夜來新忽驚平地有輕綠
已蓋六街無舊塵莫為榮枯吟野草且憐愁醉泥香輪
詩人空怨王孫遠極目萋萋又一春

草茵

明朱之蕃

青蔥初向曉痕分陌上池邊積漸殷風落繁英舒蜀錦
雲連遠岫蘼湘紋佳人鬪巧披香逕狂客揮杯藉夕曛
不待蛩吟秋露冷閒眠先自惜芳芬

五言絕句

春草

唐
皇甫冉

艸徧潁陽山花開武陵水春色既已同人心亦相似

春草

唐
曹松

不獨滿池塘夢中佳句香春風有餘力引上古城牆

芳草

唐
黃滔

澤國多芳艸年年長自春應從屈平後更苦不歸人

死央草

唐
薛濤

綠英滿香砌兩兩死央小但娛春日長不管春風早

寒草

宋
梅堯臣

寒艸纔變枯陳根已含綠始知天地仁誰道風霜酷

芳草

宋
王安石

芳草知誰種綠階已數叢無心與時競何苦綠葱葱

江南曲

元
宋
元

遙天碧蕩蕩遠草綠悵悵并作相思海春來一樣深

遊三洞金盆諸峰

元
葉
顥

犬吠人家近鳥啼春晝晴澗艸有幽色野花無定名

新草

明

袁凱

水邊春尚淺沙際葉纔穿拾翠雙雙女迢迢度碧煙

江南曲

明

王廷相

采蘅金陵江往來石城道不問江南人安識江南州

春草

明

陳沂

夜雨江南夢春風陌上情東皇如有意移向玉階生

七言絕句

宮中詞

唐

王建

新晴草色綠溫暾山雪初消滌水渾今日蹋青歸校晚
傳聲留著望春門

江邊草

唐白居易

聞君澤畔傷春草憶在天門街裏時漠漠萋萋愁滿眼
就中惆悵是江蘿

芳草

唐羅鄴

曲江岸上天街裏兩地縱生車馬多不似萋萋南浦見
晚來煙雨半相和

賞春

羅鄴

芳草和煙暖更青
閒門要路一時生
年年點檢人間事
惟有春風不世情

路傍草

唐徐夔

楚甸秦原萬里平
誰教根向路傍生
輕蹄繡轂長相蹋
合是榮時不得榮

書軒

宋蘇軾

雨昏石硯寒雲色
風動牙籤亂葉聲
庭下已生書帶草

使君疑是鄭康成

春草

宋

楊萬里

年年春色屬垂楊
金撚千絲翠萬行
今歲草芽先得計
攬他濃翠奪他黃

春草曲

宋

薛季宣

散雪枝頭寒已老
平蕪一夜鋪春草
江梅著子怯東風
花落滿庭渾不掃

西城道中

金

周昂

草路幽香不動塵
細蟬初向葉間聞
溟濛小雨來無數
雲與青山淡不分

雜詩

金王 礪

晴日南谿物色饒
草芽新綠凍全消
金絲柳底洲沙沒
數尺流波拍夜橋

清勝軒絕句

元趙孟頫

小草幽香動碧池
暖風晴日長新萸
南窗書倚綠陰靜
聽盡行人過馬蹄

王明梅東涼亭圖延祐中奉勅所作草也

元虞集

灤水東流紫霧開千門萬戶起崔嵬坡陀草色如波浪
長是鑾輿六月來

題竹院壁

元薩都拉

門外好山青入戶堦前芳草綠侵簾山僧應笑遊人醉
頭上花枝壓帽簷

上京即事

薩都拉

大野連山沙作堆白沙平處見樓臺行人禁地避芳艸
盡向曲闌斜路來

灤京雜詠

元
楊允孚

鴛鴦坡上是行宮又喜臨岐象馭通芳草撩人香撲面
白翎隨馬叫晴空

其二

鐵番竿下艸如茵澹澹東風六月春高柳豈堪供過客
好花留待蹋青人

絕句次九成韻

元倪瓚

我別故人無十日
衝烟艇子又重來
門前積雨生幽草
牆上春雲覆綠苔

偶成

倪瓚

紫燕低飛不動塵
黃鸝嬌小未勝春
東風綠遍門前艸
暮雨寒煙愁殺人

題畫

元丁鶴年

江樹青紅江草黃
好山不斷楚天長
雲中樓觀無人住

只有秋聲送夕陽

春草

明王韋

帶雨和煙未可名
春風處處不勝情
于今南浦知多少
都向王孫去後生

附莎

五言排律

移莎

唐唐彥謙

移從杜城曲
置在小齋東
正是高秋裏
仍兼細雨中
結

根妨迸竹疎蔭悅高桐冉冉齊芳草飄飄笑斷蓬片時
留靜者一夜響鳴蟲野露通宵滴谿烟盡日蒙試才卑
庾薤求味笑周松只此霜裁好他時贈伯翁

七言絕句

招周處士

唐
張籍

閉門秋雨濕牆莎俗客來稀野思多已掃書堂安藥竈
山人作意早經過

附蕪

五言古

懼歌

宋
葛長庚

岸上酒旗舞寒蕪生秋風誰家六七童手持金芙蓉

七言絕句

雨中長樂水館送趙十五滂不及

唐
李商隱

碧雲東去雨雲西苑路高高驛路低秋水綠蕪終盡分
夫君太騁錦障泥

書原上鮑處士屋壁

唐方干

水閣坐看千萬里青蕪蓋地接天津
福衡莫愛山中靜
遶舍山多却礙人

春日雜興

宋唐庚

短帽輕衫信馬行郊原春色太牽情
兔葵燕麥渾閒事
最有蕪菁到處生

小景

金呂中孚

青蕪平野四圍山山郭依依紫翠間
邨遠路長人去少

一竿斜日酒旗間

曉過橫塘

明僧戒襄

半幅蒲帆九里汀
石湖秋水接天青
舟人指點蘼蕪外
一帶青山是洞庭

附蓬

五言古

雜詩

晉司馬彪

百艸應節生
含氣有深淺
秋蓬獨何辜
飄颻隨風轉
長

飈一飛薄吹我之四遠搔首望故林邈然無由返

五言絕句

入長安詠秋蓬示辛學士

唐王績

遇坎聊知止逢風或未歸孤根何處斷輕葉強能飛
答王無功入長安詠秋蓬見示

唐辛學士

託根雖異所飄葉早相依因風若有便更共入雲飛

附茅

五言古

香茅

梁簡文帝

銅律與鳴琴俱稱類君子豈若江淮間發葉超衆美珍
同自牧歸茅因暈征起豈獨邁秦蘅方知蔑沅芷

香茅

北齊蕭祇

鵲鳩芳不歇霜繁綠更滋擢本同三脊流芳有四時麝
根縮酒易結解舞蠶遲終當入楚貢豈羨詠陳詩

附著

五言古

詠著

梁范筠

數奇不可偶性直誰能紆
禎蔡伏靈異祥雲降溫腴

附賞

五言排律

賦得數賞

唐元稹

將課司天厯先觀近砌賞
一句開應月五日數從星桂
滿叢初合蟾虧影漸零辨
時長有素數閏或餘青墜葉

推前事新芽察未形堯年始今歲方欲瑞千齡

附鳧葵

五言絕句

江行

唐
錢起

幽思正遲遲沙邊濯弄時自憐非博物猶未識鳧葵

附瓦松

五言排律

尚書都堂瓦松

唐
李華

華省祕仙蹤高堂露瓦松葉因春後長花為雨來濃影
混鴛鴦色光含翡翠容天然斯所寄地勢太無從接棟
臨雙闕連甍近九重寧知深澗底霜雪歲兼封



御定佩文齋詠物詩選卷三百九十六



總校官庶吉士臣侍朝
校對官檢討臣王坦修
謄錄貢生臣王詢

欽定四庫全書薈要

集部

御定詠物詩選卷

三百九十七至
四百五

欽定四庫全書薈要卷一萬九千十九

集部

御定佩文齋詠物詩選卷三百九十七

麟類

四言古

麟頌

漢

蔡邕

皇矣大角降生靈獸視明禮修麒麟來孚春秋既書爾
來告就庶士子鉏獲諸西狩

麒麟頌

吳

薛綜



懿哉麒麟惟獸之伯政平覲景否則戢足德以衛身不
布牙角屏營唐日帝堯保祿委體大吳以昭遐福天祚
聖帝享茲萬國

麒麟頌

西涼

李 暉

一角圓蹄行中規矩遊必擇地翔而後處不入陷穽不
罹網罟德無不王為之折股

五言律

麟

唐

李 嶠

漢祀應祥開魯郊西狩迴奇音中鍾呂成角喻英才畫
像臨仙閣藏書入帝臺若驚能吐哺為覩鳳凰來

七言絕句

步虛詞

明 孫 谷

朝鮮人

王母雲車五色麟白鸞前導向西巡天章曉奏虛皇殿
仙桂花開八萬春

其二

仙島焚香禮玉虛紫麟催駕五雲車西宮侍女多嬌笑

錄盡三天未見書

御定佩文齋詠物詩選卷三百九十七

欽定四庫全書薈要卷一萬九千二十

集部

御定佩文齋詠物詩選卷三百九十八

騶虞類

四言古

五靈頌

漢
蔡邕

大梁乘精白虎用生思敵信立繞于垣垆

騶虞頌

吳
薛綜

婉婉白虎優仁是崇飢不侵暴困不改容斂威揚德愷

悌之風聖德極盛騶虞乃彰

騶虞贊

晉郭璞

怪獸五采尾參于身矯足千里儵忽若神是謂騶虞詩
歎其仁

長短句

騶虞畫贊

唐白居易

孟山有獸仁心毛質不踐生芻不食生物有道則見非
時不出三季已還退藏于密我聞其名徵之于書不識

其形得之於圖白質黑文猊首虎軀是耶非耶孰知之
乎已矣夫已矣夫前不見其往者後不見其來者吁嗟
乎騶虞

御定佩文齋詠物詩選卷三百九十八

欽定四庫全書薈要卷一萬九千二十一

集部

御定佩文齋詠物詩選卷三百九十九

獅子類

長短句

陸探微畫獅子屏風贊

宋蘇軾

圓其目仰其鼻奮髯吐舌威見齒舞其足前其耳左顧
右盼喜見尾雖猛而和益其戲崑崙高堂護燕几啼呼
顛沛走百鬼嗚呼妙哉我陸子

七言律

獅子

明夏言

金眸玉爪目懸星，羣獸聞知盡駭驚。
怒懾熊羆威凜凜，雄驅虎豹氣英英。
曾聞西國常馴養，今出中華應太平。
却羨文殊能服爾，穩騎駕馭下天京。

七言絕句

擬古宮詞

明朱讓栩

白雪漫漫積禁堤，夜寒宮月照玻璃。
曉來宮女喧看處，

掃向盤中捏後猊

御定佩文齋詠物詩選卷三百九十九

欽定四庫全書薈要卷一萬九千二十二

集部

御定佩文齋詠物詩選卷四百

象類

四言古

象贊

晉郭璞

象實魁梧體巨貌詭肉兼十牛目不踰豕望頭如尾動
若丘徙

五言律

象

唐李嶠

鬱林開郡畢維揚作貢初萬推方演楚惠子正焚書執
燧奔吳戰量舟入魏墟六牙行致遠千葉奉高居

五言絕句

偶題

唐殷堯藩

越女收龍眼蠻兒拾象牙長安千萬里走馬送誰家

七言絕句

灤京雜詠

元楊允孚

納寶盤營象輦來畫簾紈煖九重開大臣奏罷行程記
萬歲聲傳龍虎臺

其二

聿來新貢又殊方重譯寧誇自越裳馴象明珠龜九尾
皇王不寶壽無疆

其三

怪得家僮笑語回門前驚見事奇哉老翁攜鼠街頭賣
碧眼黃髯騎象來

輦下曲

元張昱

當年大駕幸灤京
象背前馱幄殿行
國老手爐先引導
白頭聯騎出都城

御定佩文齋詠物詩選卷四百

欽定四庫全書薈要卷一萬九千二十三

集部

御定佩文齋詠物詩選卷四百一

虎類

五言古

猛虎詞

唐 儲光羲

寒亦不憂雪飢亦不食人人肉豈不甘所懼傷明神太
室為我宅孟門為我鄰百獸為我膳五龍為我賓蒙馬
一何威浮江亦以仁彩章耀朝日爪牙雄武臣高雲逐

氣浮厚地隨聲震

叶平聲

君能賈餘勇日夕長相親

遣興

唐杜甫

猛虎憑其威往往遭急縛雷吼徒咆哮枝撐已在脚忽
看皮寢處無復睛閃爍人有甚於斯足以勸元惡

挂虎圖於寢壁示桔程

宋張耒

畫工出幻事縞素發原藪蕭蕭白茅低凜凜北風走眈
然老於菟舉步安不驟目光炯雙射怒吻呀欲受彼彪
擲其旁文采澹初就雖然竊形似已足走百獸煩君衛

吾寢振此蓬蓽陋坐令盜肉鼠不敢窺白晝

猛虎行

宋 徐 照

猛虎出林行咆哮取人食居人慮虎至荆棘挂牆壁虎
乃愛其身驚遁不近側人或虎不如甘心蹈荆棘

七言古

附長短句

曲江

唐 杜 甫

自斷此生休問天杜曲幸有桑麻田故將移住南山邊
短衣匹馬隨李廣看射猛虎終殘年

和李尚書畫射虎圖歌

唐 獨孤及

飢虎呀呀立當路萬夫震恐百獸怒彤弓金鏃當者誰
鳴鞭飛控流星馳居然畫中見真態若務除惡不顧私
時和年豐五兵已白額未誅壯士恥分銖遠邇懸穀中
不中不發思全功捨矢如破石可裂應絃盡敵山為空
殺氣滿堂觀者駭颯若崖谷生長風精微入神在豪末
作績造物何同工方叔秉鉞受命新丹青起予氣益振
底綏靜難巧可擬嗟歎不足聲成文他時代天育萬物

亦以此道安斯民

猛虎行

唐
張籍

南山北山樹冥冥
猛虎白日繞林行
向晚一身當道食
山中麋鹿盡無聲
年年養子在空谷
雌雄上山不相逐
谷中近窟有山林
長向邨家取黃犢
五陵年少不敢射
空來林下看行跡

虎圖行

宋
王安石

壯哉非熊亦非羆
目光夾鏡當坐隅
橫行安尾不畏逐

顧盼欲去仍躊躇卒然一見心為動熟視稍稍摩其鬚
固知畫者巧為此此物安肯來庭除想當盤礴欲畫時
睥睨衆史如庸奴神閒意定始一掃功與造化論錙銖
悲風颯颯吹黃蘆上有寒雀驚相呼槎枒古樹鳴老烏
向之俛噉如哺雛山牆野壁黃昏後馮婦遙看亦下車

畫虎圖

宋 游子明

平生射虎裴將軍馬羆如龍弓百鈞手撚白羽旁無人
注虎使虎不敢奔須臾叢薄斑斕出人馬不知俱辟易

矢如蓬蒿弓減力將軍得歸幾敗績徐行爪牙元不露
耿耿垂頭若微顧尾剪霜風林葉飛倏忽山頭日光暮
包家畫出真於菟我尚不敢編其鬚昔人作詩譏畫圖
吁嗟畫圖今亦無

宣差射虎

金李俊民

北原風勁霜草枯草間出沒藏於菟耿耿來此被誰驅
不防邂逅馮婦車將軍膽氣勇有餘手中笑撚金僕姑
等閒如射兔與狐兩眼錯莫精光無深山大澤失所居

或捺汝頭編汝鬚可惜肉食無遠圖伎倆不及黔之驢

趙邈齟伏虎圖行

元郝經

南山射虎曾得名壁上忽見令我驚何物敢爾來戶庭
屢叱不動仍生獍畫師前身是山靈胸中有虎無丹青
老櫟數筆平掃成殺氣慘澹猛氣橫頭顱半妥蹲孤城
怒尾倒插蟠霜旌鐵鬚張礫疑有聲赤吻漉血猶帶腥
抱石欲卧伏欲騰爪入石角瞳不瞑寒電夾鏡騫兩睛
四座凜凜陰風生威稜神采出典型邈齟乃是金天精

伊昔詩家杜少陵酷愛賦馬并賦鷹為憐神俊故屢稱
我今賦虎亦有徵要得猛士建太平坐令四海皆澄清
吁嗟擲筆還撫膺世間道路多荆棘張鬼磨牙不可行

趙邈齷虎圖行

元王惲

巔崖老樹纏冰雪石觜材杈橫積鐵北平山深林樾黑
下雖有徑人跡滅耽耽老虎底許來抱石踞坐何雄哉
目光夾鏡尾束膀百獸却走潛風埃趙侯欲盡神妙功
都著威稜阿堵中想當盤礴噴墨時衆史縮手甘凡庸

至今元氣老不沒神物所在纏陰風前年驅馬下靖邊
崖東突起草底眠腰間恨無鐵絲箭寢皮食肉空長歎
今朝過喜一嚼快熟視鬚頂為摩編貨馴跣服暴戾息
弭耳道義思拳拳主人愛翫中有謂遇事炳燮通經權
我聞漢家大獵陸冰天豸冠思賦長楊篇四方猛士今
雲合早晚龍旗到渭畋

題胡氏殺虎圖

元陳旅

沙河野黑秋風颭秦陽戍卒車載弩道旁老虎夕未鋪

車中健婦不見夫倉皇下車持虎足呼兒授刀剗其腹
夫骨已斷不可續泣與孤兒餐虎肉

答祿將軍射虎行

元
納新

將軍部曲瀚海東三千鐵騎精且雄久知天命屬真主
奮身來建非常功世祖神謨涵宇宙坐使英雄皆入彀
十年轉戰淮蔡平帳下論功封太守信陽郭外山嵯峨
長林大谷青松多白額於菟踞當道城邊日落無人過
將軍聞之毛髮豎拔劍誓天期殺虎彎弓走馬出東門

傾城來看誇豪武猛虎磨牙當路呷目光睽睽斑尾搖
據鞍一叱雙皆裂鳥飛木落風蕭蕭金弰珣弓鐵絲箭
滿月弦開正當面雕翎射沒錦毛摧厓石傾頽腥血濺
萬人歡笑聲震天剖開一鏃當心穿父老持杯馬前拜
祝公眉壽三千年將軍立功期不朽奇事相傳在人口
可憐李廣不封侯却喜將軍今有後承平公子秘書郎
文場百步曾穿楊咫尺風雲看豹變鳴珂曳履登朝堂

女殺虎行

元
吳 萊

山深日落猛虎行長風振木威猙獰父樵未歸女在室
心已與虎同死生楊睛掉尾腥滿地狹路殘榛苦遭噬
豈非一氣通呼吸徒以柔軀扼強鷲君不見馮婦來下
車衆中無人尚負嵎又不見裴將軍出鳴鏑一時鞍馬
俱辟易丈夫英雄却不武臨事超超汗流雨關東賢女
不足數孝女千年傳殺虎

殺虎行

劉平妻胡氏從平戍零陽平為虎擒胡
殺虎爭夫千載義烈有足歌者猶恨時

之士大夫其作未
雄故為賦是章

元

楊維禎

夫從軍妾從主夢魂猶痛刀箭瘢况乃全軀飼豺虎拔
刀擔天天為怒眼中於菟小於鼠血號虎鬼冤魂語精
光夜貫新阡土可憐三世不復讐太山之婦何足數

猛虎行

明高啟

陰風吹林鳥鵲悲猛虎欲出人先知目光燿燿當路坐
將軍一見弧矢墮幾家插棘高作門未到日沒收豬豚
猛虎雖猛猶可喜橫行只在深山裏

題畫虎

明劉溥

千山萬山日向晡啞啞老樹愁啼鳥長途迢遞人跡絕
奮躍只有黃於菟長風颭颭震林木百獸紛披望風伏
霜牙凜凜摧萬夫金鏡瞳瞳射雙目飢來擇肉惟熊羆
不更小取豺與狸田家黃犢要耕種又肯搏攫誇能為
如今天關求守備蓋世雄威素稱異舉首為城掉尾旌
願保皇家千萬世

五言律

題虎樹亭

宋聰禪師住華亭時有二虎噬人師降伏之命名曰大青小青後瘞師塔

旁踰年生銀杏樹二今主僧

隱公闢亭樹間扁曰虎樹

元王逢

舟泊東西客詩招大小青山高白月墮草偃黑風腥植
物鍾英爽精藍被寵靈涼陰慎剪伐畱護石函經

虎洞

明金大車

靈山通上界羸馬涉遙岑天淨峯如掌風悲虎出林空
巖春晝冷石洞夜壇陰漸悟真如性還同出世心

七言律

射虎得山字

金馮延登

田翁太息論三害獵騎俄驚見一斑
涎口風生雷吼怒角弓寒勁月痕彎
柳營共許千人敵魚服仍餘一矢還
我欲殘年賞神駿短衣匹馬夢南山

畫虎圖贈真一先生

元虞集

獵獵霜風木葉乾月明曾過越王山
青龍久待蟠仙鼎赤豹相呼守帝關
終歲采芝茅阜曲豐年收穀杏林間
誰家稚子能為御長與桃椎共往還

謝希大虎皮

明儲巘

風簷短札墨漸開多謝臯比撤送來食肉我非投筆相
寢皮君有控弦材毫端擬畫真難類座上聞談祇漫猜
却笑銜恩還戀闕車茵穩稱不須裁

五言絕句

復愁

唐杜甫

人煙生僻處虎跡過新蹄野鵲翻窺草邨船逆上谿

山中夜宿

唐顧況

涼月挂層峯蘿牀落葉重掩關深畏虎風起撼長松

題潞州壁

唐僧普滿

此水連涇水雙珠月滿川青牛將赤虎還賀太平年

九月中曾題二小詩於南谿竹上既而忘之昨

日再遊見而錄之錄一

宋蘇軾

誰謂江湖居而為虎豹宅焚山豈不能愛此千竿碧

七言絕句

答東林道士

唐韋應物

紫閣西邊第幾峯茅齋夜雪虎行蹤遙看黛色知何處
欲出山門尋暮鐘

小遊仙詩

唐曹唐

百辟朝回閉玉除露風清晏桂花疎西歸使者騎金虎
羶鞢垂鞭唱步虛

射虎

元張弘範

黑風萬騎卷空山怒吼巖林出錦斑得意將軍飛鐵鏃
忽驚一點草梢殷

荊谿雜曲

明王叔承

賣殘竹菌筍還來收罷蘭花蕙又開
但使山田饒秣米何妨虎跡遍莓苔

追和張外史遊仙詩

明余善

城闕芙蓉曉未分身騎金虎謁元君
青童不道天家近笑指空中五色雲

山居雜詠

明僧慧浸

行到深深一翠微人多畏虎閉山扉
我今最愛茲山住

虎跡多時人跡稀

山居詩

明僧法杲

青山疊疊繞珠林
磬響時兼流水音
虎不避人人避虎
虎能先我息機心

御定佩文齋詠物詩選卷四百一

欽定四庫全書薈要卷一萬九千二十四集部

御定佩文齋詠物詩選卷四百二

豹類

七言古 附長短句

臘日觀咸寧王部曲娑勒擒豹歌

唐
盧綸

山頭曈曈日將出山下獵圍照初日前林有獸未識名
將軍促騎無人聲潛形踈伏草不動雙雕旋轉羣鴉鳴

陰方質子才二十譯語受詞番語揖捨鞍解甲疾如風
人忽虎蹲獸人立欬然扼吭批其頤爪牙委地涎淋漓
既蘇復吼勸仁怒果決英謀生致之拖自深叢目如電
萬夫失容千馬戰傳呼賀拜聲相連殺氣騰陵陰滿川
始知縛虎如縛鼠敗敵降羌生眼前祝爾嘉詞爾毋苦
獻爾將隨犀象舞苑中流水禁中山期爾攫搏開天顏
非熊之兆慶無極願紀雄名傳百蠻

文豹篇贈王介夫

宋

梅堯臣

壯哉南山豹不畏白額虎澤霧毛雖雜鼪鼠朝捋其鬚
暮飲乳文章子雲久已許還笑大夫費五殺天子仗中
儀物舉尾與旂常願看取

五言律

詠豹

唐李嶠

車法肇宗周鼪文闡大猷還將君子變來蘊太公籌委
質超羊羴飛名列虎侯若令逢雨露長隱南山幽

七言絕句

雨中贈仙人山貢山人

唐柳宗元

寒江夜雨聲潺潺曉雲遮盡仙人山
遙知玄豹在深處下笑羈絆泥塗間

灤京雜詠

元楊允孚

撒道黃塵輦路過香焚萬室格天和
兩行排列金錢豹欽察將軍上馬駝

御定佩文齋詠物詩選卷四百二

欽定四庫全書薈要卷一萬九千二十五

集部

御定佩文齋詠物詩選卷四百三

熊羆類

五言古

落日射羆

梁元帝

促宴引枚鄒中園觀獸侯日度墉陰廣風橫旗影浮移
竿標入箭疊鼓送爭籌附枝時可息言從清夜遊

七言古

王世賞席上題林良鷹熊圖

明 李東陽

坡陀連延出林麓孤鷹盤拏熊縮伏金眸耀日開蒼煙
健尾捎風起平陸由來異物乃同性意氣飛揚兩撐矗
山跑野掠紛路歧何事相逢輒相肉側睨翻疑批亢來
迅步直欲空壁逐乾坤蒼茫色慘淡落木蕭颼滿空谷
羣豺斂跡百鳥停萬里長空齊注目是誰畫者誠崛奇
筆勢似與渠爭速坐間賓客皆起避階下兒童駭將蹴
當筵看畫催索詩卷帙不待高閣東平生搏擊非我才

欲賦真愁成刻鵠微酣對此髮雙豎酒令詩籌復相督
頓令拙劣成麤豪一飲步兵三百斛

五言律

熊

唐李嶠

導洛宜陽右乘春別館前昭儀忠漢日太傅翼周年列
射三侯滿興師七步旋莫言舒紫褥猶異飲清泉

詠馮昭儀當熊

唐賈至

白羽插雕弓蜺旌動朔風平明出金屋扈輦上林中逐

獸長廊靜呼鷹御苑空王孫莫諫獵賤妾解當熊

御定佩文齋詠物詩選卷四百三

欽定四庫全書薈要卷一萬九千二十六

集部

御定佩文齋詠物詩選卷四百四

駱駝類

四言古

索駝

晉郭璞

駝惟奇畜肉鞍是被迅驚流沙顯功絕地潛識泉源微
乎其智

五言古

後出軍

元張翥

行行鐵兜牟隊隊金駱駝
鳴鳴吹銅角來來齊唱歌
總戎面如虎指顧揮琱戈
馬蹄無賊壘手筭可填河
王師本無敵安用戰圖多

七言絕句

蜀駝引

唐馮涓

昂藏大步蠶叢國曲頸微伸高九尺
卓女窺窗我莫知
嚴仙據案何曾識

塞下曲

宋 嚴羽

一身遠客逐戎旌
落日蕭條望古城
漸近磧西無水草
北風沙起駱駝驚

駝車行

元 劉秉忠

駝項丁當響巨鈴
萬車軋軋一齊鳴
當年不離沙陀地
輾斷金原鼓笛聲

河湟書事

元 馬祖常

波斯老賈渡流沙
夜聽駝鈴識路賒
採玉河邊青石子

收來東國易桑麻

明安驛道中

元陳孚

貂鼠紅袍金盤陀仰天一箭雙天鵝
琱弓放下笑歸去急鼓數聲鳴駱駝

灤河曲

元貢師泰

推髻使來交趾國橐駝車宿李陵臺
遙聞徹夜鈴聲過知進六宮瓜果迴

塞上曲

元納新

雜沓羶車百輛多五更衝雪渡灤河當轅老嫗行程慣
倚岸敲冰飲橐駝

灤京雜詠

元楊允孚

翎出王侯部落多香風簇簇錦盤陀燕姬翠袖顏如玉
自按轅條駕駝

其二

東風吹暖柳如煙寄語行人緩著鞭燕舞巧防鴉鵲落
馬嘶驚起駝眠

輦下曲

元張昱

駝裝序入日精門銅鼓牙旗作隊喧一聽巡階鈴鉞振
滿宮俱喜出迎恩

元宮詞

明朱有燾

春遊到處景堪誇厭戴名花插野花笑語懶行隨鳳輅
內官催上駱駝車

上谷歌

明徐渭

昨向居庸劔戟過今朝流水是洋河無數黃旗呵過客

有時青草站鳴駝

次韻王敏文待制燕京雜詠

明僧來復

曉宴皇姑拜上家金錢滿賜索駝車黃門前道飛鞚過
貂帽斜簪利市花

御定佩文齋詠物詩選卷四百四

欽定四庫全書薈要卷一萬九千二十七

集部

御定佩文齋詠物詩選卷四百五

馬類

三言古

天馬歌

漢

樂府

太乙祝天馬下露赤汗沫流赭志倣儻精權竒籥浮雲
晻上馳體容與迤萬里今安匹龍為友

五言古

繫馬

梁簡文帝

青驪流赭汗綠地懸花蹄未垂青鞵尾猶挂紫障泥蹠
足絆中憤搖頭檻上嘶紫關如未息直去取榆谿

後園看騎馬

梁元帝

良馬出蘭池連翩驅桂枝鳴珂隨跼駛輕塵逐影移香
來知驟近汗斂覺風吹遙望黃金絡懸識幽并兒

走馬引

梁張率

良馬龍為友玉珂金作羈馳驚宛與洛半驟復半馳倏

忽而千里光景不及移九方惜未見薛公寧所知斂轡
且歸去吾畏路傍兒

紫驪馬

陳
徐陵

玉鐙繡纏髻金鞍錦覆幪風驚塵未起草淺埒猶空角
弓連兩兔珠彈落雙鴻日斜馳逐罷聯翩還上東

紫驪馬

陳
張正見

將軍入大宛善馬出從戎影絕乾河上聲流水窟中似
鹿猶依草如龍欲向空須還十萬里試為一追風

天馬引

陳傅綽

驄色表連錢出冀復來燕取用偏開地為歌乃號天權
奇意欲遠蹊蹠勢難前本珍白玉鐙因飾黃金鞭願酬
芻秣寵千里得千年

驄馬

隋庾抱

櫪上浮雲驄本出吳門中發跡來東道長鳴起北風迴
鞍拂柱白頰汗類塵紅滅沒徒留影無因圖漢宮

飲馬歌

唐李益

百馬飲一泉一馬爭上游一馬噴成泥百馬飲濁流上
有滄浪客對之空歎息自顧纓上塵徘徊終日夕為問
泉上翁何時見沙石

御驃出廐圖

元王惲

何人拂絹素寫此房駟精一馬老伏櫪志在千里行二
馬騁躔齧角壯猶龍騰一馬方輓塵海岸翻鯢鯨畫師
慘淡意落筆矜多能我觀寓所感國制貴有經唐人重
馬政分屯列郊坰當時百萬匹肅肅羅天兵東封與西

蕩歲用不可勝嗣王獵其餘尚足開中興乃知三軍本
匪馬將奚憑聖經說備豫萬古為世程倉卒事亦辦未
免衆目驚我思立仗間振鬣伸長鳴所言固芻蕘聖經
其可輕

鞭馬圖

元
袁
桷

生駒萬里意所向知無前圉人忌其德未試先加鞭要
令俛首馴使我常相憐伯樂去已久此道不復傳駕車
困泥途伏櫪老歲年所用非所養誰能別嫵妍畫師遂

時好謂爾誠當然披圖重歎嗟我意何由宣

七言古 附長短句

蒲梢天馬歌

漢武帝

天馬徠兮從西極經萬里兮歸有德承靈威兮障外國
涉流沙兮四夷服

舞馬篇

唐薛曜

星精龍種競騰驤雙眼黃金紫艷光一朝逢遇昇平代
伏皐銜圖事帝王我皇盛德苞六羽俗泰時和虞石拊

昔聞九代有餘名今日百獸先來舞鈎陳周衛儼旌旄

鐘鐃陶匏聲殷地承雲嘈囋駭日靈調露鏗鉉動天馬

奔塵飛箭若麟螭躡景追風忽見知咀銜拉鐵並權奇

被服雕章何陸離紫玉鳴珂臨寶鐙青絲綵絡帶金羈

隨歌鼓而電驚逐丸劍而飈馳態聚踳還急驕凝驟不

移光獻白日下氣擁綠煙垂婉轉盤跚殊未已懸空步

驟紅塵起驚鳬翔鷺不堪儔矯鳳迴鸞那足擬衡垂桂

裊香氣氲長鳴汗血盡浮雲不辭辛苦來東道祇為蕭

韶朝夕聞閭闔間玉臺側承恩煦兮生光色鸞銕銕車
翼翼備國容兮為戎飾充雲翹兮天子庭荷日用兮情
無極吉良乘兮一千歲神是得兮天地期大易占云南
山壽趁趕共樂聖明時

畫馬篇

唐高適

君侯櫪上驄貌在丹青中馬毛連錢蹄鐵色圖畫光輝
驕玉勒馬行不動勢若來權奇蹴踏無塵埃感茲絕代
稱妙手遂令談者不容口麒麟獨步自可珍駑駘萬匹

知何有終未如他櫪上驄載華轂騁飛鴻荷君剪拂與
君用一日千里如旋風

驄馬行

唐杜甫

鄧公馬癖人共知初得花驄大宛種夙昔傳聞思一見
牽來左右神皆竦雄姿逸態何嶄峩顧影驕嘶自矜寵
隅目青瑩夾鏡懸肉駿礮礮連錢動朝來少試華軒下
未覺千金滿高價赤汗微生白雪毛銀鞍却覆香羅帕
卿家舊物公取之天廐真龍此其亞晝洗須騰涇渭深

夕趨可刷幽并夜吾聞良驥老始成此馬數年人更驚
豈有四蹄疾於鳥不與八駿俱先鳴時俗造次那得致
雲霧晦冥方降精近聞下詔宣都邑肯使騏驎地上行

韓幹馬十五匹

宋蘇軾

二馬並驅攢八蹄二馬宛頸駿尾齊一馬任前雙舉後
一馬却避長鳴嘶老髯奚官騎且顧前身作馬通馬語
後有八匹飲且行微流赴吻若有聲前者既濟出林鶴
後者欲涉鶴俛啄最後一匹馬中龍不嘶不動尾搖風

韓生畫馬真是馬蘇子作詩如見畫世無伯樂亦無韓
此詩此畫誰當看

題腰褭圖

宋秦觀

雙瞳夾鏡權協月尾鬣蕭森澤於髮鞍銜不施韁復脫
旁無馭者氣騰越地如砥平丘隴滅天寒日暮抱飢渴
驤首號鳴思一發超軼絕塵入恍惚東門金鑄久銷歇
曹霸丹青亦云沒賴有龍眠戲揮筆眼前時見千里骨
玉臺閭闔相因依嗟爾龍媒空自奇鸞旗日行三十里

馬用逐風追電為

劉善長出示李伯時畫馬圖

宋朱子

俯首舉尾拳一蹄掣韁欲嗅驕不嘶奚官聳肩兩足垂
意貌自與造父齊雞目麟鬣鳳呈臆玉山禾遠未容食
蕭雲追電有餘地置之畫圖人豈識精神權奇孰可班
當在白兔青龍間君知此馬從何來龍眠胸中十二閑

戲題出洗馬

元趙孟頫

鬣邾躡駕誰能御驚蹇紛紛何足顧青絲絡首錦障泥

鞭筭空勞怨長路明窗戲寫乘黃姿洗刷歸來氣如怒
不須對此苦歎嗟男兒自昔多徒步

裝馬曲

元 袁 桷

綵絲絡頭百寶裝猩血入纓火齊光錫鈴交驅八風轉
東西夾翼雙龍岡伏日翠裘不知重珠帽齊肩顫金鳳
絳闕蔥朧旭日初逐電迴飈斗光動寶刀羽箭鳴玲瓏
雁翅却立朝重瞳沈沈梭殿雲五色法曲初奏歌薰風
酏官庭前列千斛萬甕葡萄凝紫玉駝峯熊掌翠金珍

碧實冰盤行陸續
湏臾玉卮黃帕覆
寶訓傳宣爭頻首
黑河夜渡辛苦多
畫戟雕闕總勲舊
龍媒嘶風日將暮
宛轉琵琶前起舞
鳴鞭靜蹕宮門閉
長跪齊聲呼萬歲

題滾塵騶圖

元虞集

驂駟食粟石每既
立仗歸來汗如洗
脫羈展轉聊自恣
落花塵土隨身起
君不見春雷起蟄
龍欠伸霧擁雲蒸
九河水

神馬歌次韻陳元之

元楊載

神馬來自崑崙西有足未始行沙泥朝趨欲出飛鳥上
夕逝直與奔星齊綠鬃半散插雙耳赤汗交流攢四蹄
風神秀猛陜天地豈顧燕蔡并渠黎時時牽浴臨清谿
對人誇煞黃鬚奚玉山之禾中芻秣不啮堤頭枯草稊
與君側耳聽長嘶凡馬不聞生駃騠

曹將軍下槽馬圖

元 揭傒斯

曹霸畫馬真是馬宛頸相摩槽檻下卓犖權奇果如此
豈有世上無知者朱絲不是凡馬韁天閑十二皆龍驤

曾從天子平四方畫圖彷彿餘驪黃華山之陽春草長

韓幹馬

揭傒斯

韓幹畫出曹將軍幹惟畫肉猶逼真昂藏四顧欲飛去
老奚安知馬有神想當此馬未畫時朝刷吳越暮燕秦
頓轡長鳴風動地不數驂驪與騏驎當時用舍那知許
粉墨蕭條尚雄武千金駿骨何足論萬世長留羣玉府

畫馬

元
薩都拉

漢水楊波洗龍骨房星墮地天馬出四蹄蹀躞若流星

兩耳尖修如削筆天閑十二連青雲生長出入黃金門
鼓鬃振尾恣偃仰食粟何以酬主恩豈堪碌碌同凡馬
長鳴噴沫奚官怕入為君王駕鼓車出為將軍靜邊野
將軍與爾同死生要令四海無戰爭千古萬古歌太平

題二馬圖

元貢師泰

鐵喙騶連錢驄何年墜影江水中蒲梢西來八尺龍天
閑十二為爾空五花雲錦吹東風

劉舍人桃花馬歌

元納新

青絲駿馬桃花色翠鞍玉轡黃金勒奚奴牽出不敢騎
道上行人爭愛惜往時曾遇李將軍汗流赤血氣如雲
朝刷黃河暮南粵沙場百戰成奇勲歸來無心伏櫓櫓
頓轡長鳴思奮力東家白面繡衣郎千金買去遊南陌
昨朝校獵向城隅萬人爭說天下無夜歸不怕霸陵尉
玉鞭醉打蒼頭奴畫燭銀屏歡徹曙一朝金盡賓朋去
可憐驕馬屬誰家斷繮猶繫階前樹君不見西家款段
三十年青芻滿櫪菽滿田老翁不識城下路騎看射獵

南山邊

觀內廐洗馬

元 朱德潤

黃雲灑雨沙場秋，灘高水平凝不流。
曉霜襲透蒼駝裘，圉人浴馬津水頭。
綠驃連錢雙驂驕，日光射波脂膩浮。
青絲脫鞚黃金鉤，輕爬短刷濕未收。
三花剪髮平且柔，籊雲駿氣將無儔。
束芻斗豆豈馬羞，茫茫豐草生林丘。
霜蹄胡為踏長楸，振鬣一躍期天遊。

題張參政所藏驄馬滾塵圖

朱德潤

盛唐太僕王毛仲八坊分隊三花動當時畫馬稱曹韓
尺素幻出真龍種玉花照夜爭新妍一馬滾塵駿尾鮮
昂頭不受金絲絡汗血輾沙生畫烟翰林妙寫不減古
名駒染出青毫素延祐君王賞駿材金盤賜帛開當宁
時清處處生驪駒何必漢朝稱渥洼王良幸勿嗔踉蹌
一躍天衢千里沙

題畫馬

元薛漢

渥洼龍媒少人識世上駑駘日充斥班生畫馬畫兩匹

駿骨雄姿殊未得赭袍烏幘坐奚官似出春風十二閑
掩圖不語三太息我方垂耳鹽車間

二月八日遊皇城西華門外觀嘉孥弟走馬歌

元
張
憲

春風壓城紫燕飛繡鞍寶勒生光輝軟莎青青平似鏡
花雨滿巾風滿衣潛蛟雙綰玉抱肚朱躡分光散紅霧
金龍五爪蟠綵袍滿背真珠撒秋露生猿俊健雙臂長
左脚撥鐙右蹴繯銅鏡四扇遶十指玉聲珠碎金琅璫

黃蛇下飲雷掣地錦鷹打兔起復墜袖雲突兀鞍面空
銀甕駝囊兩邊縋西宮綵樓高插天鳳凰繚繞排神仙
玉皇拍闌誤一笑不覺四蹄如迸煙神駒長鳴背凝血
郎君轉面醉眼纈天恩剪下五色雲打鼓歸來汗如雪

姚少師所藏八駿圖

明
曾 榮

周家八馬如飛電夙昔傳聞今始見銳耳雙分秋竹批
拳毛一片桃花旋肉駿疊聳高崔嵬權奇知此真龍媒
霜蹄試踏層冰裂駿尾欲掉長飈迴瑤池宴罷歸來早

絡月羈金照京鎬紫韉飛時逐落花雕鞍解處眠芳草
由來駿骨健且馴弄影驕嘶不動塵有時渴飲天津水
五色照見波粼粼圉官騎來難久駐飲向春流最深處
珠銜寶勒不敢疏直恐飛騰化龍去古來善畫韋與韓
此畫豈同凡馬看人間造次不可得首猶秋深煙雨寒

趙松雪畫馬

明
劉溥

王孫畫馬世無敵一畫一回飛霹靂千里長風入綵毫
平沙碧草春無跡硯池想是通渥洼突然走出白鼻騮

翻濤浴浪動光彩雲影滿身堆玉花玉花連錢汗流血
駿尾捎風蹄踏鐵何時騎得似畫中踏破陰山古時雪

龍駒

明張居正

天馬徠翼飛龍蹄削玉耳垂筒碧月懸雙頰明星貫兩
瞳文皇將士盡羆虎復有龍駒助神武流矢當胸戰不
休汗溝血點桃花雨壩上摧鋒第一功策勲何必減元
戎君不見虎士標形麟閣裏龍駒亦入畫圖中

題韓幹畫馬圖

明僧宗衍

唐朝畫馬誰第一韓幹妙出曹將軍此圖無乃幹所作
世上有若真空羣雙瞳精瑩兩耳立蘭筋束骨皮肉急
何年霹靂起龍池五花一團雲氣濕當年天子少馬騎
遠求烏孫詔寫之即今內廐多如蟻縱有騏驎畫者誰

題畫馬

明僧妙聲

皎皎白馬白於練首如渴烏目如電天閑騏驎人不見
畫師為我開生面圉人牽浴定昆池落花滿地驕不嘶
青絲絡頭無一丈挽住萬里崑崙蹄

其二

畫師胸中有全馬三馬斯須生筆下中有一匹玉花驄
似是西來大宛者不羣不食意氣豪羞與二馬同凡槽
使我見畫三太息于今誰是九方臯

五言律

詠飲馬

唐太宗

駿骨飲長涇奔流灑絡繆細紋連噴聚亂荇繞蹄縈水
光鞍上側馬影溜中橫翻似天池裏騰波龍種生

詠飲馬應制

唐楊師道

清晨控龍馬，弄影出花林。
蹀躞依春澗，聯翩度碧潯。
苔流染絲絡，水潔寫雕簪。
一御瑤池駕，詎憶長城陰。

紫驪馬

唐沈佺期

青玉紫驪鞍，驕多影屢盤。
荷君能剪拂，蹀躞噴桑乾。
踰足追奔易，長鳴遇賞難。
縱金一萬里，霜露不辭寒。

驄馬

唐楊炯

驄馬鐵連錢，長安俠少年。
帝畿平若水，官路直如弦。
夜

玉妝車軸秋金鑄馬鞭風霜但自保窮達任皇天

紫驪馬

唐李白

紫驪行且嘶雙翻碧玉蹄臨流不肯渡似惜錦障泥白
雪關山遠黃雲海樹迷揮鞭萬里去安得戀春閨

送劉評事充朔方判官賦得征馬嘶

唐高適

征馬向邊州蕭蕭嘶不休思深應帶別聲斷為兼秋岐
路風將遠關山月共愁贈君從此去何日大刀頭

浴馬

唐喻鳧

解控復收鞍長津動細漣空蹄沈綠玉潤臆沒連錢沫
漩橋聲下嘶盤柳影邊常聞稟龍性固與白波便

文紀行贈以小步馬

元楊奐

洛水西頭路桃花夾岸香偏宜紅叱撥小試紫遊韁雨
徑沙初軟春山草正長杖藜猶過我此別莫相忘

立仗馬

元張憲

照夜玉狻猊霜毛鐵鑿蹄春風金絡腦小雨錦障泥御

駕馳天上軍封受海西日供三品料絨口不聞嘶

五言排律

天驥呈材

唐 鄭 蕡

毛骨合天經拳奇步驟輕曾邀于闐駕新出貳師城噴
勒金鈴響追風汗血生酒亭畱去跡吳坂認嘶聲力可
通衢試材堪聖代呈王良如顧盼垂耳欲長鳴

天驥呈材

唐 徐仁嗣

至德符天道龍媒應聖明追風奇質異噴玉彩毛輕蹀

蹊形難狀連拳勢乍呈
効才矜逸態絕影表殊名
峽路寧辭遠關山豈憚行
鹽車雖不駕今日亦長鳴

騏驥長鳴

唐章孝標

有馬骨堪驚無人眼暫明
力窮吳坂峻嘶苦朔風生
逐逐懷良御蕭蕭顧樂鳴
瑤池期弄影天路欲飛聲
皎月誰知種浮雲莫問程
鹽車終願脫千里為君行

歸馬華山

唐白行簡

牧野功成後周王戰馬閒
驅馳休伏皂飲齕任依山
逐

日朝仍去隨風暮自還
冰生疑隴坂葉落似榆關
蹀躞仙峯下騰驤渭水灣
幸逢時偃武不復鼓鞶間

勅賜三相馬

唐張隨

上苑驂驪出中宮
詔命傳九天班錫禮
三相代勞年顧主聲猶發
追風力正全鳴珂龍闕下
噴玉鳳池前四足疑雲滅
雙瞳比鏡懸為因能致遠
今日表求賢

西戎獻馬

唐周存

天馬從東道皇威被遠戎
來參八駿列不假貳師功
影

別流沙路嘶流上苑風望雲時蹀足向月每爭雄稟異
才難狀標奇志豈同驅馳如見許千里一朝通

七言律

舞馬千秋萬歲樂府詞

唐張說

金天誕聖千秋節玉醴還分萬壽觴試聽紫駟歌樂府
何如騄驥舞華岡連騫勢出魚龍變蹀躞驕生鳥獸行
歲歲相傳指樹日翩翩來伴慶雲翔

其二

聖皇至德與天齊
天馬來儀自海西
腕足徐行拜兩膝
繁驕不進踏千蹄
髣髴奮鬣時蹲踏
鼓怒驤身忽上躋
更有銜杯終宴曲
垂頭掉尾醉如泥

其三

遠聽明君愛逸才
玉鞭金翅引龍媒
不因茲白人間有
定是飛黃天上來
影弄日華相照耀
噴含雲色且徘徊
莫言闕下桃花舞
別有河中蘭葉開

驄馬

唐
萬楚

金絡青驄白玉鞍長鞭紫陌野遊盤朝驅東道塵恒滅
暮到河源日未闌汗血每隨邊地苦蹄傷不憚隴陰寒
君能一飲長城窟為盡天山行路難

裴相公大學士見示答張秘書謝馬詩并羣公

屬和因命追作

唐
劉禹錫

草玄門戶少塵埃丞相并州寄馬來初自塞垣銜苜蓿
忽行幽徑破莓苔尋花緩轡威遲去帶酒垂鞭蹢躅迴
不與王侯與詞客知輕富貴重清才

公垂尚書以白馬見寄光潔穩善以詩謝之

唐
白居易

翩翩白馬稱金羈
領綴銀花尾曳絲
毛色鮮明人盡愛
性靈馴善主偏知
免將妾換慙來處
試使奴牽欲上時
不蹶不驚行步穩
最宜山簡醉中騎

和張十八秘書謝裴相公寄馬
白居易

齒齋臆足毛頭膩
秘閣張郎叱撥駒
洗了頷花翻假錦
走時蹄汗蹋真珠
青衫乍見曾驚否
紅粟難賒得飽無

丞相寄來應有意遣君騎去上雲衢

賀張十八秘書得裴司空馬

唐韓愈

司空遠寄養初成毛色桃花眼鏡明落日已曾交轡語
春風還擬並鞍行長令奴僕知飢渴須著賢良待性情
旦夕公歸申拜謝免勞騎去逐雙旌

謝裴司空寄馬

唐張籍

駉駉新駒駿得名司空遠自寄書生乍離華廐移蹄澀
初到貧家舉眼驚每被閒人來借問多尋古寺獨騎行

長思歲旦沙堤上得從鳴珂傍火城

紫驕馬

唐
秦韜玉

渥洼奇骨本難求況是豪家重紫驕
臆大宜懸銀壓胯力渾欺著玉銜頭
生獐弄影風隨步蹊蹠衝塵汗滿韝
若遇丈夫能控馭任從騎取覓封侯

白馬

唐
翁綬

渥洼龍種雪霜同毛骨天生膽氣雄
金埒乍調光照地玉關初別遠嘶風
花明錦韉垂楊下露濕朱纓細草中

一夜羽書催轉戰紫髯騎出佩驛弓

代書寄馬

唐 韋 莊

驅馳曾在五侯家見說初生自渥洼
鬃白似披梁苑雪頸肥如撲杏園花
休嫌綠綬嘶貧舍好著紅纓入使衙
穩上雲衢三萬里年年長踏魏堤沙

繫白馬詩上薛僕射

唐 平 曾

白馬披鬃練一團今朝被絆欲行難
雪中放去空畱跡月下牽來只見鞍
向北長鳴天外遠臨風斜控耳邊寒

自知毛骨還應異更請孫陽仔細看

韓左軍馬圖卷

元錢選

韓公胸次有神奇寫得天閑八尺駒曾為岐王天上賜
不隨都護雪中驅霜蹄奮迅追飛電鳳首昂藏似渴烏
春草青青華山曲三邊今日已無虞

大宛二馬

天廐所有詔
錫張蔡公

元郝經

二馬飄飄萬里來玉花蕭颯上金臺風生兩耳雲霄近
電掣雙瞳日月開渥水虎文連殺氣大宛龍種絕氛埃

將軍正欲成勲業看汝驍騰展驥才

畫馬

元范梈

一自房星一渥洼龍媒多在玉皇家赤毛灑血微生汗
黑暈團雲整作花不待老能知失道固應来自涉流沙
如今豈少真神駿猶有丹青紙上誇

上都詐馬大讌

元貢師泰

紫雲扶日上璇題萬騎來朝隊仗齊織翠轡長攢孔雀
鏤金鞍重嵌文犀行迎御輦爭先避立近天墀不敢嘶

十二街頭人聚看傳言丞相過沙堤

天馬

元郭翼

四年遠涉流沙道筋骨權奇舊肉駿曉秣龍堆寒蹙雪
晚經月窟怒追風漢文千里知曾却曹霸丹青貌不同
拂拭金鞍被來好幸陪天廐玉花驄

題趙仲穆彥徵畫馬

明錢宰

驄馬連錢新鑿蹄絡頭羈馭任官奚來從月窟真無價
進入天閑不敢嘶雨露九重思冀北風塵千里下淮西

解鞍知在休兵後楊柳平河春草齊

五言絕句

白馬

唐賈至

白馬紫連乾嘶鳴丹闕前聞珂自蹀躞不要下金鞭

馬詩

唐李賀

龍脊貼連錢銀蹄白踏煙無人識錦韉誰為鑄金鞭

其二

大漠沙如雪燕山月似鉤何當金絡腦萬里踏清秋

其三

香襖赭羅新盤龍蹙鐙鱗
回看南陌上誰道不逢春

偶成

元貢性之

雪色西番馬臨流顧影嘶
似嫌金絡重蹴碎落花泥

和李長吉馬詩

元郭翼

肉礪錦纏駿流雲汗似紅
太平無戰伐驂驪走沙蓬

其二

龍性非凡質騰波出紫雲
檀溪飛過日應識漢將軍

其三

龍印畱官字霜花剝暗毛長鳴愁過影祇憶九方臯

其四

霞口縷銜塞霜蹄削玉寒曉看經邏此暮已驀樓蘭

其五

神駿知無匹驍騰絕域來流沙一丈雪夜拂白龍堆

其六

天子飛黃馬牽來賜近臣玉階新雨過風滾落花塵

其七

內殿玉花驄斑斑歟肉駿奚官新浴罷沙苑踏春風

其八

佛郎通上國萬里進龍媒曉日開閭闔虹光射玉臺

其九

天馬誰能馭和鸞駕紫微年年清暑去霹靂逐龍飛

少年樂

明
徐有貞

少年騎駿馬意氣兩相驕馳騁春風裏人看滿渭橋

紫驪馬

明汪淮

誰家白面郎跨下紫驪馬
跼跼踏落花驕嘶綠楊下

其二

黃金絡馬首白玉作馬鞭
盤旋不肯去牆外看鞦韆

六言絕句

舞馬詞

唐張說

萬玉朝宗鳳宸千金率領龍媒盼
鼓凝驕蹀躞聽歌弄

影徘徊

其二

天鹿遙徵衛叔日龍上偕羲和將共兩驂爭舞來隨八
駿齊歌

其三

綵旄八佾成行時龍五色因方屈膝銜杯赴節傾心獻
壽無疆

七言絕句

天馬詞

唐
張仲素

天馬初從渥水來
郊歌曾唱得龍媒
不知玉塞沙中路
首着殘花幾處開

其二

蹀躞宛駒齒未齊
縱金噴玉向風嘶
來時欲盡金河道
獵獵輕風在碧蹄

羽林騎

唐
韓翃

駿馬牽來御柳中
鳴鞭欲向渭橋東
紅啼亂踏春城雪
花領驕嘶上苑風

看調馬

韓翃

鴛鴦赭白齒新齊
曉日花間散碧蹄
玉勒斗回初噴沫
金鞭欲下不成嘶

樂府

唐劉言史

花額紅駿一向偏
綠槐香陌欲朝天
仍嫌衆裏驕行疾
傍鐙深藏白玉鞭

舞馬

唐陸龜蒙

月窟龍孫四百蹄
驕驤輕步應金鞞
曲終似要君王寵

回望紅樓不敢嘶

馬圖同裕之賦

金李純甫

天馬飛來不苦難
雲屯萬騎開元間
太平有象韓生筆
曾見真龍如此閒

子昂逸馬圖

元袁桷

神駿飄飄得自閒
天池飛躍下塵寰
青絲絡首誰收得
畱與春風十二閑

桃花馬

元馬祖常

白毛紅點巧安排勾引春風上背來莫解雕鞍橋下浴
恐隨流水汎天台

題宋成之畫馬卷

元曹伯啟

奚官珍重玉花驄縱意清漣碧草中幸際四庭烽火靜
不須騰踏待秋風

洗馬圖

元張伯淳

蕭蕭霧鬣與風駿撲面征塵一洗空相顧倍增神駿氣
恍疑初在渥洼中

曹霸下槽馬

元虞集

捩下長年飽豆芻誰通馬語識踟躕主恩深重知何報
或者東封駕鼓車

韓幹馬

虞集

開元沙苑蒺藜秋韓幹新圖總不收天廐真龍奇骨在
故知臣甫負驂騑

畫馬

虞集

蕭條沙苑貳師還首偕秋風盡日閒白髮圉人曾習御

長鳴知是憶關山

唐人四馬卷

元宋无

金銜初脫齒新齊
蹄玉無聲赤汗微
昨日杏園春宴罷
滿身紅雨帶花歸

其二

簇仗回來玉勒閒
黃門牽向落花間
君王不愛長楊獵
嘶入春風十二閑

其三

霜蹄踏月早朝回尾弄紅絲拂紫苔日暖龍池初洗罷
尚方聞進御鞍來

其四

太僕新調試錦韉九重日色照連錢春來興慶池邊路
偏稱宮中軟玉鞭

三馬圖

元陳旅

豹股龍膺百戰餘凌煙長櫺載璫璵時平不出橫門道
願為君王駕鼓車

題飲馬圖

元 傅若金

一斛寒泉照紫騮
蕭蕭駿尾動高秋
夜來握上西風滿
憶傍寒雲飲隴頭

題趙仲穆揩癢馬圖

元 朱德潤

渥洼天馬骨如龍
散步春郊苜蓿中
揩徧玉駿塵未落
日斜宮樹影搖風

畫馬

元 貢性之

天閑牽出自奚官
飲罷春流未解鞍
記得曾陪仙仗立

五雲深處隔花看

其二

駿馬驍騰不受羈
貢來遠自渥洼西
花陰立仗歸來晚
騎向天街自在嘶

其三

奚官牽出莫歸遲
豐草甘泉御苑西
記得曉趨金殿直
百花深處聽驕嘶

王架閣家畫馬

明
高 啟

草草髯奴紺綠衣王家好馬詫新肥解鞍閒立斜陽裏
應是城南賭射歸

雙馭圖

明張羽

內官妝束樣能齊宛洛春風信馬蹄共說放朝無一事
看花直到夾城西

畫馬

明鍾績

雙駒汗血已斑斑蹀躞春風意態閒聞道千金求駿骨
不應龍種在人間

紫騮馬

明 王慎中


朱汗四垂碧玉蹄
韁絲陡勒不勝嘶
長安陌上催花雨
萬樹紅英踏作泥

題趙松雪馬圖

明 僧來復

振鬣長鳴產月支
玉關風急貢來時
五花獅子真龍種
賜出黃門不敢騎

御定佩文齋詠物詩選卷四百五



總校官庶吉士臣侍朝

校對官檢討臣王坦修

謄錄監生臣張泰